

ციფრული ჩართულობა და კომუნიკაციის სოციალური უთანასწორობები თანამედროვე საქართველოში

ვაჟა გურგენიძე
სტუ-ს პროფესორი

ირინე გოგიჩაიშვილი
სტუ-ს დოქტორანტი

რეზიუმე

წინამდებარე სტატია იკვლევს ციფრული ჩართულობისა და კომუნიკაციის სოციალური უთანასწორობების ურთიერთმიმართებას თანამედროვე საქართველოს კონტექსტში. კვლევა ეფუძნება შერეულ კვლევით დიზაინს, რომელიც აერთიანებს რაოდენობრივ გამოკითხვას (CATI, N=1500) და ექსპერტულ სიღრმისეულ ინტერვიუებს. ანალიზი ეფუძნება კომუნიკაციის სოციოლოგიისა და სოციალური თეორიის კლასიკურ და თანამედროვე ჩარჩოებს.

კვლევის შედეგები აჩვენებს, რომ საქართველოში ციფრული ჩართულობა მაღალია რაოდენობრივად, თუმცა მკვეთრად დიფერენცირებულია ასაკის, განათლების, საცხოვრებელი გარემოსა და ციფრული კომპეტენციის მიხედვით. ციფრული მედიის ფართო გამოყენება არ უზრუნველყოფს ჩართულობის თანაბარ ხარისხს და ვერ გარდაიქმნება ავტომატურად ეფექტიან დემოკრატიულ მონაწილეობად. გამოვლინდა ჰიბრიდული საკომუნიკაციო მოდელი, სადაც თანაარსებობს ციფრული და ტრადიციული არხები, თუმცა ისინი განსხვავებულ სოციალურ ფუნქციებს ასრულებს სხვადასხვა ჯგუფისთვის. სტატია აჩვენებს, რომ კომუნიკაციური უთანასწორობები საქართველოში არ არის მხოლოდ ტექნოლოგიური წვდომის ან ინდივიდუალური არჩევანის შედეგი, არამედ განპირობებულია სოციალური სტრუქტურებით, ინსტიტუციური ნდობის დეფიციტითა და პოლიტიკური პოლარიზაციით. ციფრული ჩართულობა ამ კონტექსტში განიხილება როგორც სოციალური რესურსი, რომელიც ერთდროულად ქმნის თვითგამოხატვის შესაძლებლობებს და აძლიერებს სოციალურ დიფერენციაციას. კვლევის მიგნებები მნიშვნელოვანია როგორც აკადემიური დისკუსიისთვის, ისე მედია-განათლებისა და დემოკრატიული პოლიტიკის შემუშავებისთვის.

საკვანძო სიტყვები: ციფრული ჩართულობა, კომუნიკაციის სოციალური უთანასწორობები, ჰიბრიდული მედია გარემო, სოციალური ფრაგმენტაცია, მედიანიგნიერება, დემოკრატიული ჩართულობა

DIGITAL INCLUSION AND SOCIAL INEQUALITIES OF COMMUNICATION IN MODERN GEORGIA

Vazha Gurgenidze,
Professor of GTU
Irine Gogichaishvili
PhD student of GTU

ABSTRACT

This article examines the relationship between digital inclusion and social inequalities in communication in contemporary Georgia. The study employs a mixed-methods research design, combining a nationwide quantitative survey (CATI, N=1500) with expert in-depth interviews. The analysis is grounded in classical and contemporary frameworks of communication sociology and social theory.

The findings indicate that while digital inclusion in Georgia is quantitatively high, it is significantly differentiated by age, education, place of residence, and levels of digital competence. Extensive internet use does not ensure equal quality of participation and does not automatically translate into effective democratic engagement. The study identifies a hybrid communication model in which digital and traditional media coexist but perform different social functions across social groups.

The article demonstrates that communication inequalities in Georgia are not merely the result of technological access or individual choice, but are shaped by social structures, institutional distrust, and political polarization. Digital inclusion is conceptualized as a social resource that simultaneously enables participation and reinforces social differentiation. The findings contribute to academic debates on digital inequality and offer practical implications for media policy, education, and democratic governance in transitional societies.

Keywords: Digital inclusion, social inequalities in communication, hybrid media environment, social fragmentation, media literacy, democratic participation.

შესავალი

ბოლო ათწლეულებში კომუნიკაციის სივრცე რადიკალურად გარდაიქმნა ციფრული ტექნოლოგიების, სოციალური მედიისა და პლატფორმული გარემოს გავრცელების შედეგად. კომუნიკაცია აღარ წარმოადგენს მხოლოდ ინფორმაციის გადაცემის ტექნიკურ პროცესს; იგი სულ უფრო მეტად იქცევა სოციალური ურთიერთობების, ძალაუფლების, იდენტობისა და უთანასწორობების წარმოებისა და გარდაქმნის ცენტრალურ მექანიზმად. ციფრული მედია, ერთი მხრივ, აფართოებს ჩართულობის შესაძლებლობებს, ამარტივებს ურთიერთქმედებას და ზრდის ინფორმაციის ხელმისაწვდომობას, თუმცა მეორე მხრივ, წარმოშობს ახალი ტიპის სოციალური განსხვავებებისა და ასიმეტრიების სისტემას.

თანამედროვე სოციალურ მეცნიერებებში ჩამოყალიბდა კონსენსუსი, რომ ციფრული ჩართულობა არ არის ნეიტრალური ან უნივერსალური ფენომენი. ინდივიდთა მონაწილეობა ციფრულ საკომუნიკაციო სივრცეში განსხვავდება სოციალური პოზიციის, განათლების, ასაკის, კულტურული კაპიტალისა და საცხოვრებელი გარემოს მიხედვით. შედეგად, კომუნიკაციური პრაქტიკები დიფერენცირდება და ყალიბდება უთანასწორობების ისეთი ფორმები, რომლებიც სცდება კლასიკურ ეკონომიკურ ან ტექნოლოგიურ განსხვავებებს და მოიცავს სიმბოლურ, კოგნიტურ და დისკურსულ განზომილებებს. ამ კონტექსტში ციფრული ჩართულობა შეიძლება განვიხილოთ როგორც სოციალური რესურსი, რომელიც ერთდროულად აძლიერებს ჩართულობას და ამავე დროს განამტკიცებს საზოგადოებრივ სივრცეში არსებულ განსხვავებებს.

საქართველოს კონტექსტში აღნიშნული საკითხი განსაკუთრებულ აქტუალობას იძენს. ქვეყანა დემოკრატიული ტრანზიციის პირობებში იმყოფება, სადაც საზოგადოებრივი დისკურსი მაღალი პოლიტიკური დატვირთვით, მედიაპოლარიზაციითა და ინსტიტუციური ნდობის დეფიციტით ხასიათდება. ამ გარემოში კომუნიკაცია იქცევა არა მხოლოდ ინფორმაციის მიმოცვლის საშუალებად, არამედ სოციალური პოზიციონირების, პოლიტიკური თვითგამოხატვისა და ძალაუფლებრივი ურთიერთობების მნიშვნელოვან სივრცედ. ციფრული მედიის დომინაცია ინფორმაციის მიღებაში თანაარსებობს ტრადიციული მედიისა და ინტერპერსონალური ქსელების ძლიერ გავლენასთან, რაც ქმნის ჰიბრიდულ, მრავალდონიან საკომუნიკაციო გარემოს.

მიუხედავად იმისა, რომ საქართველოში არსებობს ცალკეული კვლევები მედიის, პოლიტიკური კომუნიკაციისა და ციფრული ტექნოლოგიების შესახებ, ნაკლებად არის გაანალიზებული ციფრული ჩართულობისა და კომუნიკაციის სოციალური უთანასწორობების ურთიერთკავშირი ერთიან თეორიულ-ემპირიულ ჩარჩოში. არსებული კვლევები ხშირად ფოკუსირდება ან ტექნოლოგიურ წვდომაზე, ან მედიის შინაარსზე, მაშინ როდესაც ნაკლებ

ყურადღებას უთმობს იმ სოციალურ მექანიზმებს, რომლებიც განსაზღვრავს, ვინ, როგორ და რა ხარისხით მონაწილეობს თანამედროვე კომუნიკაციურ პროცესებში.

წინამდებარე სტატიის მიზანია გაანალიზოს ციფრული ჩართულობისა და კომუნიკაციის სოციალური უთანასწორობების ურთიერთმიმართება თანამედროვე საქართველოში. კვლევა ეფუძნება რაოდენობრივი მონაცემებისა და ექსპერტული შეფასებების ინტეგრირებულ ანალიზს და მიმართავს კომუნიკაციის სოციოლოგიისა და სოციალური თეორიის კონცეპტუალურ ჩარჩოებს. სტატია აჩვენებს, რომ კომუნიკაციური უთანასწორობები საქართველოში არ არის მხოლოდ ინდივიდუალური არჩევანის ან ტექნოლოგიური ხელმისაწვდომობის შედეგი, არამედ სოციალური სტრუქტურებით, ინსტიტუციური გარემოთი და პოლიტიკური კონტექსტით განპირობებული პროცესია.

უნდა აღინიშნოს, რომ თანამედროვე კომუნიკაციის ანალიზი მოითხოვს მის გააზრებას არა მხოლოდ ტექნოლოგიური ცვლილებების, არამედ სოციალური სტრუქტურებისა და ძალაუფლებრივი ურთიერთობების კონტექსტში. ციფრული მედიის გავრცელებამ მნიშვნელოვნად შეცვალა ინფორმაციის წარმოების, გავრცელებისა და მიღების ფორმები, თუმცა ეს ცვლილებები არ არის ერთგვაროვანი და თანაბრად განაწილებული. პირიქით, ციფრული ჩართულობა თავად იქცევა სოციალური დიფერენციაციის მნიშვნელოვან მექანიზმად, რომელიც ასახავს და ამავე დროს აძლიერებს არსებულ სოციალურ უთანასწორობებს.

სოციოლოგიური თეორიის კლასიკური მიდგომები გვაძლევს საშუალებას დავინახოთ, რომ კომუნიკაცია არ წარმოადგენს ნეიტრალურ სივრცეს. იურგენ ჰაბერმასი კომუნიკაციას განიხილავს როგორც საზოგადოებრივი აზრის ფორმირების და დემოკრატიული მონაწილეობის ცენტრალურ საფუძველს. მისი „კომუნიკაციური ქმედების თეორიის“ მიხედვით, საზოგადოებრივი ინტეგრაცია ეფუძნება რაციონალურ დისკურსს, სადაც მონაწილეები თანაბარი პირობებით მონაწილეობენ არგუმენტირებულ დიალოგში. თუმცა ციფრული მედიის პირობებში ეს მოდელი სერიოზულ ტრანსფორმაციას განიცდის: ალგორითმულად მართული პლატფორმები, ემოციურად დამუხტული კონტენტი და პოლიტიკური პოლარიზაცია ზღუდავს დისკურსის რაციონალურობას და ამცირებს თანაბარი ჩართულობის შესაძლებლობას. შედეგად, საჯარო სივრცე უფრო ფრაგმენტირებული და ასიმეტრიული ხდება, რაც განსაკუთრებულად თვალსაჩინოა გარდამავალ დემოკრატიებში.

ამ პროცესების სისტემურ დონეზე გააზრებას გვთავაზობს ნიკლას ლუმანი, რომლის მიხედვითაც საზოგადოება ფუნქციონირებს როგორც ავტოპოესისური კომუნიკაციური სისტემა. ლუმანის თეორიაში კომუნიკაცია არ არის ინდივიდთა ნებისა და

ცნობიერების პირდაპირი შედეგი; იგი თავად ქმნის სოციალურ რეალობას, მნიშვნელობებსა და კოდებს. ციფრული მედიის ეპოქაში ეს განსაკუთრებით მნიშვნელოვანია, რადგან მედია გარემო დიდწილად განსაზღვრავს, რა თემებზე მიმდინარეობს საზოგადოებრივი მსჯელობა და ვის ეძლევა მასში მონაწილეობის შესაძლებლობა. ამგვარად, ციფრული ჩართულობა გარდაიქმნება სისტემურ რესურსად, რომელიც განსაზღვრავს ინდივიდის მონაწილეობას საზოგადოებრივ დისკურსში და ამავე დროს ამყარებს კომუნიკაციურ უთანასწორობებს.

კომუნიკაციის მიკრო-სოციალურ დონეზე ანალიზს ავითარებს ირვინგ გოფმანი, რომლის დრამატურგიული მიდგომა ყურადღებას ამახვილებს თვითრეზენტიაციასა და სოციალური როლების შესრულებაზე. ციფრულ სივრცეში ინდივიდები მუდმივად მართავენ შთაბეჭდილებებს — არჩევენ, რას გააზიარებენ, როგორ წარმოაჩენენ საკუთარ პოზიციას და რომელ დისკურსში ჩაერთვებიან. ეს პროცესი არ არის თანაბარი: სოციალური სტატუსი, განათლება და კულტურული კაპიტალი განსაზღვრავს, რამდენად ეფექტიანად შეუძლია ინდივიდს საკუთარი პოზიციის წარმოჩენა და აღიარების მოპოვება. შესაბამისად, სოციალური მედია ერთდროულად ქმნის თვითგამოხატვის შესაძლებლობას და ამავე დროს აძლიერებს სიმბოლურ უთანასწორობებს.

მაკრო და მიკრო დონეებს შორის კავშირის გააზრებისთვის განსაკუთრებით მნიშვნელოვანია ენტონი გიდენსის სტრუქტურაციის თეორია. გიდენსის მიხედვით, სოციალური სტრუქტურები არ არსებობს ინდივიდებისგან დამოუკიდებლად; ისინი მუდმივად იქმნება და განახლდება სოციალური პრაქტიკების მეშვეობით. კომუნიკაცია სწორედ ის სივრცეა, სადაც ეს დუალობა — აგენტისა და სტრუქტურის ურთიერთმიმართება — ყველაზე მკაფიოდ ვლინდება. ციფრული ჩართულობა ამ კონტექსტში შეიძლება განვიხილოთ როგორც აგენტური მოქმედების რესურსი, რომელიც ინდივიდებს აძლევს დისკურსში მონაწილეობის შესაძლებლობას, თუმცა ამავე დროს ექვემდებარება პლატფორმული წესების, ალგორითმების და სოციალური ნორმების ზეგავლენას.

ამ თეორიული პერსპექტივების სინთეზი საშუალებას იძლევა კომუნიკაციის სოციალური უთანასწორობები განვიხილოთ როგორც მრავალდონიანი ფენომენი. ასაკი, განათლება, სოციალური სტატუსი და საცხოვრებელი გარემო განსაზღვრავს არა მხოლოდ ტექნოლოგიურ წვდომას, არამედ ჩართულობის ხარისხს, ინფორმაციის ინტერპრეტაციის უნარს და საზოგადოებრივ დისკურსში მონაწილეობის ფორმებს. ციფრული ჩართულობა, ამგვარად, არ წარმოადგენს მხოლოდ ტექნიკურ შესაძლებლობას; იგი არის სოციალური პოზიციის, სიმბოლური ძალაუფლებისა და ინსტიტუციური გარემოს შედეგი.

საქართველოს კონტექსტში ეს თეორიული ჩა-

რჩო განსაკუთრებულ მნიშვნელობას იძენს. ჰიბრიდული მედია გარემო, პოლიტიკური პოლარიზაცია და ინსტიტუციური ნდობის დეფიციტი ქმნის პირობებს, სადაც კომუნიკაცია ერთდროულად ასრულებს ინტეგრაციისა და გამიჯვნის ფუნქციას. შესაბამისად, ციფრული ჩართულობის ანალიზი გვაძლევს საშუალებას დავინახოთ, როგორ იწარმოება და გარდაიქმნება სოციალური უთანასწორობები თანამედროვე კომუნიკაციურ პრაქტიკებში და რატომ ვერ იქცევა ციფრული სივრცე ავტომატურად თანასწორ მონაწილეობის არენად.

აღნიშნული სტატია ეფუძნება შერეულ კვლევით დიზაინს, რომელიც აერთიანებს რაოდენობრივ გამოკითხვასა და ექსპერტულ სიღრმისეულ ინტერვიუებს. აღნიშნული მიდგომა არჩეულ იქნა იმ მიზნიდან გამომდინარე, რომ ციფრული ჩართულობა და კომუნიკაციის სოციალური უთანასწორობები გააზრებულიყო როგორც სტატისტიკური ტენდენციების, ისე მათი უკან მდგომი სოციალური მექანიზმების დონეზე.

რაოდენობრივი კვლევა ჩატარდა სატელეფონო ინტერვიუს (CATI) მეთოდით 2025 წლის ოქტომბერ-ნოემბერში. გამოკითხულ იქნა 18 წლის და უფროსი ასაკის 1500 რესპონდენტი საქართველოს მასშტაბით. შერჩევა განხორციელდა შემთხვევითი პრინციპით, რაც უზრუნველყოფს მონაცემების რეპრეზენტატიულობას ძირითადი დემოგრაფიული პარამეტრების მიხედვით (ასაკი, სქესი, რეგიონი). მიღებული მონაცემები დამუშავდა SPSS პროგრამის გამოყენებით. ანალიზისას გამოყენებულ იქნა აღწერითი სტატისტიკა, კროსტაბულაციები χ^2 ტესტითა და Cramer's V კოეფიციენტით, ასევე ბივარიაციული კორელაციები.

რაოდენობრივი კვლევის პარალელურად ჩატარდა 6 ექსპერტული სიღრმისეული ინტერვიუ მედიის, სოციოლოგიის, პოლიტიკური კომუნიკაციისა და სატელეკომუნიკაციო სფეროს წარმომადგენლებთან. ექსპერტული მონაცემები გამოყენებულია რაოდენობრივი შედეგების ინტერპრეტაციისა და კონტექსტუალიზაციისთვის.

კვლევის ანალიტიკურ ბირთვს წარმოადგენს ორი კომპოზიტური ინდექსი:

1. სოციალური ფრაგმენტაციისა და ნდობის კრიზისის ინდექსი, რომელიც აერთიანებს სოციალურ უთანასწორობას, თაობათაშორის გაუცხოებას, ტერიტორიულ დისბალანსს და საზოგადოებრივი ნდობის შემცირებას (Cronbach's $\alpha = 0.69$);
2. დემოკრატიული ჩართულობისა და დიალოგის ინდექსი, რომელიც ზომავს მოქალაქეობრივი ნორმატიულობისა და დიალოგის მხარდაჭერის დონეს (Cronbach's $\alpha \approx 0.60$).

კვლევის შედეგები ცხადყოფს, რომ საქართველოში ციფრული ჩართულობა მაღალია რაოდენობრივად, თუმცა მკვეთრად დიფერენცირებულია სოციალური ფაქტორების მიხედვით. რესპონდენტთა უმრავლესობა ინტერნეტს იყენებს ყოველდღიუ-

რად და დიდწილად მობილური მონაცემების მეშვეობით, რაც მიუთითებს კომუნიკაციის მობილიზაციასა და ციფრული პრაქტიკების გაძლიერებაზე. ამასთან, მაღალი ინტერნეტმომხმარებე არ ნიშნავს ჩართულობის ერთგვაროვნებას.

ასაკი ერთ-ერთ ყველაზე ძლიერ დიფერენცირების ფაქტორად გამოვლინდა. კროსტაბულაციურმა ანალიზმა აჩვენა სტატისტიკურად მნიშვნელოვანი კავშირი ასაკსა და ინფორმაციის მიღების ძირითად წყაროებს შორის (χ^2 , $p < 0.001$): ახალგაზრდა ჯგუფები მნიშვნელოვნად მეტად ეყრდნობიან სოციალურ მედიასა და ონლაინ პლატფორმებს, ხოლო უფროს ასაკობრივ ჯგუფებში იზრდება ტელევიზიისა და ინტერპერსონალური წყაროების როლი. ეს მიგნება ადასტურებს, რომ ციფრული ჩართულობა საქართველოში თაობობრივად სტრუქტურირებულია და განსხვავებული კომუნიკაციური ეკოსისტემები თანაარსებობს.

განათლების დონე ასევე მკაფიოდ უკავშირდება როგორც ინფორმაციის მიღების არხებს, ისე ინფორმაციულ კომპეტენციას. უმაღლესი განათლების მქონე რესპონდენტები გაცილებით ხშირად იყენებენ მრავალწყაროიან ონლაინ მედია გარემოს და უფრო მაღალია მათი თვითშეფასება სანდო ინფორმაციის გარჩევის უნარის თვალსაზრისით (χ^2 , $p < 0.001$). განათლება ამ კონტექსტში არ მოქმედებს მხოლოდ როგორც ფორმალური კვალიფიკაცია, არამედ როგორც კოგნიტიური და კულტურული რესურსი, რომელიც ზრდის კომუნიკაციის ხარისხს.

ციფრული კომპეტენცია კვლევაში გამოიკვეთა როგორც დამოუკიდებელი და სისტემური ფაქტორი. კროსტაბულაციებმა აჩვენა ძლიერი კავშირი ციფრულ კომპეტენციასა და ინფორმაციის მიღების წყაროებს შორის (χ^2 , $p < 0.001$; Cramer's $V \approx 0.26$). კორელაციურმა ანალიზმა დაადასტურა, რომ ციფრული კომპეტენცია დადებითად, თუმცა სუსტად კორელირებს როგორც ინფორმაციულ ჩართულობასთან ($r \approx 0.13$), ისე დემოკრატიული ჩართულობისა და დიალოგის ინდექსთან ($r \approx 0.07$). ეს მიუთითებს, რომ ციფრული უნარები არ შემოიფარგლება ტექნიკური შესაძლებლობებით და უკავშირდება მოქალაქეობრივ და დიალოგურ განზომილებებსაც.

ტერიტორიული ფაქტორი (ქალაქი/სოფელი) მნიშვნელოვან როლს თამაშობს ინფორმაციული ეკოსისტემის ფორმირებაში. ქალაქის მოსახლეობაში უფრო მაღალია ონლაინ მედიისა და სოციალური პლატფორმების გამოყენება, მაშინ როდესაც სოფლის მოსახლეობაში ძლიერია ტრადიციული მედიისა და პირადი ქსელების როლი (χ^2 , $p < 0.001$). ექსპერტული ინტერვიუები ამ განსხვავებას უკავშირებს ინფრასტრუქტურულ, ეკონომიკურ და კულტურულ ფაქტორებს, რაც კიდევ ერთხელ აჩვენებს, რომ კომუნიკაციური არჩევანი სოციალური გარემოს ფარგლებში ყალიბდება.

სოციალური ფრაგმენტაციისა და ნდობის კრი-

ზისის ინდექსმა წარმოაჩინა დუალისტური სურათი: ერთი მხრივ, ძლიერია ოჯახის და ახლო სოციალური ქსელების როლი ემოციური მხარდაჭერისა და ინფორმაციული ნდობის თვალსაზრისით; მეორე მხრივ კი ფართოდ არის გავრცელებული საზოგადოებრივი ერთიანობის შესუსტებისა და ნდობის კლების განცდა. ეს პარადოქსი მიუთითებს იმაზე, რომ ციფრული და სოციალური კომუნიკაცია ერთდროულად ამყარებს მიკრო-სოციალურ კავშირებს და ასუსტებს მაკრო-სოციალურ ინტეგრაციას.

პოლიტიკური და სამოქალაქო კომუნიკაციის ანალიზმა აჩვენა ნორმატიულ მხარდაჭერასა და ინსტიტუციურ უნდობლობას შორის არსებული დაძაბულობა. დემოკრატიული ჩართულობისა და დიალოგის ინდექსის მაღალი საშუალო მაჩვენებელი ადასტურებს, რომ მოქალაქეები მნიშვნელოვნად აფასებენ არჩევნებში მონაწილეობას, აქტიურობასა და დიალოგს. თუმცა ამავე დროს დაბალია პოლიტიკური ეფექტიანობის განცდა და ინსტიტუციური ნდობა. ეს შედეგი აჩვენებს, რომ ციფრული ჩართულობა საქართველოში ვერ გარდაიქმნება ავტომატურად ეფექტიან დემოკრატიულ მონაწილეობად.

დასკვნები

წარმოდგენილი კვლევა ადასტურებს, რომ თანამედროვე საქართველოში ციფრული ჩართულობა წარმოადგენს არა მხოლოდ ტექნოლოგიურ, არამედ მკვეთრად სოციალურ ფენომენს, რომელიც სტრუქტურირდება ასაკის, განათლების, სოციალური სტატუსის, საცხოვრებელი გარემოსა და ციფრული კომპეტენციის მიხედვით. რაოდენობრივი და ექსპერტული მონაცემების ინტეგრირებული ანალიზი აჩვენებს, რომ კომუნიკაციის ფორმები, საკომუნიკაციო არხების გამოყენების პრიორიტეტები და ინფორმაციული ჩართულობის ხარისხი არ არის ჰომოგენური და ერთგვაროვანი, არამედ სოციალურად დიფერენცირებული.

კვლევამ ცხადყო, რომ საქართველოში კომუნიკაციური გარემო ფუნქციონირებს **ჰიბრიდული მოდელით**, სადაც ტრადიციული (ტელევიზია, სატელეფონო ზარი, პირისპირ ურთიერთობა) და ციფრული არხები (სოციალური მედია, ონლაინ პლატფორმები, მესენჯერები) თანაარსებობს და განსხვავებულ სოციალურ ფუნქციებს ასრულებს. ეს ჰიბრიდულობა განსაკუთრებით მკაფიოდ ვლინდება თაობათა შორის, რეგიონულ კონტექსტებში და განათლების სხვადასხვა დონეზე.

ემპირიულად დადასტურდა, რომ **ასაკი და განათლება** წარმოადგენს კომუნიკაციური უთანასწორობების ერთ-ერთ ყველაზე ძლიერ განმსაზღვრელ ფაქტორს. ახალგაზრდები მეტად ინტეგრირებული არიან მრავალარხიან ციფრულ ეკოსისტემაში, მაშინ როდესაც უფროს ასაკობრივ ჯგუფებში ძლიერია ტრადიციული მედიისა და ინტერპერსო-

ნალური ქსელების როლი. განათლება ზრდის არა მხოლოდ ციფრული არხების გამოყენების ინტენსივობას, არამედ ინფორმაციის კრიტიკული გააზრებისა და გადამოწმების შესაძლებლობას.

კვლევაში გამოყვანილმა **სოციალური ფრაგმენტაციისა და ნდობის კრიზისის ინდექსმა** აჩვენა პარადოქსული სურათი: ერთის მხრივ, ძლიერია ოჯახის და ახლო სოციალური ქსელების როლი ემოციური მხარდაჭერისა და ინფორმაციული ნდობის თვალსაზრისით; მეორეს მხრივ კი ფართოდ არის გავრცელებული საზოგადოებრივი ნდობის შემცირების და სოციალური ერთიანობის შესუსტების განცდა. ეს მიუთითებს მიკრო-სოციალური კავშირების სიმტკიცისა და მაკრო-სოციალური ინტეგრაციის სისუსტის თანაარსებობაზე.

დემოკრატიული ჩართულობისა და დიალოგის ინდექსმა აჩვენა მოქალაქეობრივი ნორმატიულობის მაღალი დონე — მოსახლეობა ფართოდ იზიარებს პოლიტიკური მონაწილეობის, დიალოგისა და არჩევნებში ჩართულობის მნიშვნელობას. ამავდროს, ფიქსირდება ინსტიტუციური ნდობის დაბალი დონე და პოლიტიკური ეფექტიანობის სუსტი განცდა, რაც მიუთითებს პოლიტიკური კომუნიკაციის სტრუქტურულ წინააღმდეგობაზე.

თეორიული ინტერპრეტაცია ადასტურებს, რომ კომუნიკაცია საქართველოში არ ფუნქციონირებს როგორც ნეიტრალური ტექნოლოგიური პროცესი. იგი წარმოადგენს სოციალურ სივრცეს, სადაც ერთდროულად წარმოიქმნება ინტეგრაციისა და დიფერენციაციის მექანიზმები, ძალაუფლებრივი ასიმეტრიები და დისკურსული უთანასწორობები. ეს მიგნებები შეესაბამება იურგენ ჰაბერმასის საჯარო სფეროს კონცეფციას, ნიკლას ლუმანის სისტემურ მიდგომას, ერვინგ გოფმანის ინტერაქციულ პერსპექტივასა და ენტონი გიდენსის სტრუქტურაციის თეორიას.

რეკომენდაციები

1. მედიაინგნიერებისა და კრიტიკული აზროვნების სისტემური გაძლიერება
2. რეკომენდებულია მედიაინგნიერებისა და ციფრული ეთიკის ინტეგრირება განათლების ყველა დონეზე — სასკოლო, საუნივერსიტეტო და ზრდასრულთა განათლების პროგრამებში. კვლევა აჩვენებს, რომ ინფორმაციული გარემოს მთავარი პრობლემა საქართველოში უკავშირდება არა ინფორმაციის ხელმისაწვდომობას, არამედ მისი კრიტიკული შეფასების დეფიციტს.
3. რეგიონული და ასაკობრივი ციფრული უთანასწორობების შემცირება
4. ინტერნეტ ინფრასტრუქტურის განვითარებას თან უნდა ახლდეს საზოგადოებრივ სივრცეებში (ბიბლიოთეკები, საზოგადოებრივი ცენტრები) ტექნოლოგიური მხარდაჭერისა და კონსულტაციის სერვისების გაძლიერება, რაც განსაკუთრებით

მნიშვნელოვანია რეგიონებისა და ხანდაზმული ასაკობრივი ჯგუფებისთვის.

5. ხანდაზმული ჯგუფებისთვის ადაპტირებული ციფრული განათლების პროგრამები

6. საჭიროა მარტივ, პრაქტიკაზე ორიენტირებულ ტრენინგებზე დაფუძნებული პროგრამების შექმნა, რომლებიც ხელს შეუწყობს უფროსი თაობის წარმომადგენლების ციფრულ გარემოში ინტეგრაციას და შეამცირებს ინფორმაციული იზოლაციის რისკს.

7. პოლიტიკური კომუნიკაციის ხარისხის გაუმჯობესება

8. რეკომენდებულია პოლიტიკური კომუნიკაციის ეთიკური და ინსტიტუციური ჩარჩოების გაძლიერება, მედიის პასუხისმგებლობის ზრდა და დეზინფორმაციის საწინააღმდეგო მექანიზმების განვითარება ისე, რომ არ შეიზღუდოს გამოხატვის თავისუფლება და საზოგადოებრივი დიალოგი.

9. განათლების სისტემაში კომუნიკაციური კომპეტენციების ინტეგრირება

10. განათლების პოლიტიკა მიზანმიმართულად უნდა უკავშირდებოდეს კომუნიკაციური კომპეტენციების განვითარებას, რაც მოიცავს ტექნიკურ უნარებს, კრიტიკულ აზროვნებას და მოქალაქეობრივ განათლებას.

11. საზოგადოებრივი დიალოგის მხარდაჭერი ჰიბრიდული პლატფორმების შექმნა

12. სახელმწიფო და სამოქალაქო სექტორის დონეზე მიზანშეწონილია ისეთი ონლაინ და ოფლაინ სივრცეების განვითარება, რომლებიც ხელს შეუწყობს არგუმენტირებულ დისკუსიას და შეამცირებს პოლარიზებულ კომუნიკაციურ პრაქტიკებს.

გამოყენებული ლიტერატურა:

1. Habermas, J. (1989). The structural transformation of the public sphere: An inquiry into a category of bourgeois society. MIT Press.
2. Giddens, A. (1984). The constitution of society: Outline of the theory of structuration. University of California Press.
3. Goffman, E. (1959). The presentation of self in everyday life. Anchor Books.
4. Luhmann, N. (1995). Social systems. Stanford University Press.
5. Quan-Haase, A., Harper, M. G., & Wellman, B. (2021). Digital media use and emotional well-being: The role of communication modes. *Journal of Computer-Mediated Communication*, 26(4), 181–198. <https://doi.org/10.1093/jcmc/zmac009>
6. Pew Research Center. (2023). Social media and information consumption patterns. Pew Research Center.
7. van Dijk, J. (2020). The digital divide. Polity Press.
8. Couldry, N., & Hepp, A. (2017). The mediated construction of reality. Polity Press.